

Na osnovu čl. 4.2., 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", broj 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 49. Pravilnika o licencama – Prečišćeni tekst ("Službeni glasnik BiH", broj 63/16), rješavajući po zahtjevu pravnog lica "Green Energy Trading – Trgovina zelenom energijom" d.o.o., Čitluk od 11. jula 2025. godine, na sjednici Državne regulatorne komisije za električnu energiju, održanoj 3. septembra 2025. godine, donijeta je

ODLUKA

O IZMJENI ODLUKE O IZDAVANJU LICENCE ZA DJELATNOST MEĐUNARODNE TRGOVINE ELEKTRIČNOM ENERGIJOM

1. U Odluci o izdavanju licence za djelatnost međunarodne trgovine električnom energijom broj 05-28-12-223-16/24 od 13. augusta 2024. godine, tačka 1. mijenja se i glasi:
"Pravnom licu "Green Energy Trading – Trgovina zelenom energijom" d.o.o., Čitluk, izdaje se licenca za obavljanje djelatnosti međunarodne trgovine električnom energijom."
2. Ova Odluka stupa na snagu danom donošenja, a njen dispozitiv bit će objavljen u "Službenom glasniku BiH" i službenim glasilima entiteta.

Obrazloženje

Pravno lice "Green Energy Trading – Trgovina zelenom energijom" d.o.o., s ranijim sjedištem u Širokom Brijegu, Knešpolje bb, vlasnik je licence za obavljanje djelatnosti međunarodne trgovine električnom energijom, koja mu je izdata Odlukom Državne regulatorne komisije za električnu energiju (u daljnjem tekstu: DERK) broj 05-28-12-223-16/24 od 13. augusta 2024. godine, na period od 30. septembra 2024. godine do 29. septembra 2029. godine.

Vlasnik licence je aktom od 11. jula 2025. godine, zavedenim pod brojem 05-28-12-220-1/21, podnio zahtjev za izmjenu licence, uz koji je priložen aktuelni izvod iz sudskog registra Općinskog suda u Mostaru od 17. juna 2025. godine. Iz navedenog izvoda je utvrđeno da su u sudski registar upisane promjene sjedišta i adrese, osnivača, osnivačkog kapitala, kao i lica ovlaštenih za zastupanje ovog pravnog lica, te je iz sudskog registra brisan raniji skraćeni naziv firme.

Shodno članu 49. stav 7. Pravilnika o licencama – Prečišćeni tekst, promjenom licence ne smatra se promjena naziva, sjedišta ili adrese vlasnika licence. Međutim, u konkretnom slučaju, u sudski registar upisana je, između ostalog, promjena osnivača pravnog lica i promjena lica odgovornih za zastupanje, što se, imajući u vidu odredbe člana 49. stav 5. Pravilnika, smatra promjenama bitnih podataka u sudskom registru i iziskuje provođenje postupka izmjene licence. Postupak izmjene licence se, u skladu s članom 49. stav 4. Pravilnika o licencama, vodi na isti način kao i postupak izdavanja licence.

Imajući to u vidu, DERK je o podnijetom zahtjevu postupao u skladu s odredbama 8. do 16. Pravilnika o licencama – Prečišćeni tekst.

Zahtjev je podnjet s dokazom o prethodno izvršenoj uplati naknade za rješavanje zahtjeva i relevantnim dokumentima koji su omogućili DERK-u da razumije, razmatra i odlučuje o podnijetom zahtjevu, o čemu je obavijestio podnosioca zahtjeva svojim aktom broj 05-28-12-220-3/25 od 16. jula 2025. godine.

Po pregledu i provjeri svih formalnih elemenata zahtjeva, DERK je 17. jula 2025. godine objavio u dnevnim novinama i na svojoj internet stranici kratku obavijest za javnost, sumirajući zahtjev za izmjenu licence i odredio rok do 25. jula 2025. godine za dostavljanje komentara javnosti na podnijeti zahtjev za izmjenu licence.

DERK je konstatirao da nisu dostavljani komentari javnosti u vezi podnijetog zahtjeva za izmjenu licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješaka.

U postupku odlučivanja po zahtjevu, a imajući u vidu činjenicu promjene lica ovlaštenih za zastupanje, DERK je utvrdio ispunjenost kriterija iz člana 26. stav 2. tačka l) i m) Pravilnika o licencama – Prečišćeni tekst, budući da su u postupku DERK-u dostavljena uvjerenja nadležnog suda da protiv novog zakonskog zastupnika i prokuriste nije pokrenut krivični postupak, niti traju mjere sigurnosti ili zaštitne mjere zabrane obavljanja poziva, djelatnosti ili dužnosti.

Nadzor usklađenosti dosadašnjeg djelovanja vlasnika licence s uvjetima i kriterijima za obavljanje djelatnosti međunarodne trgovine električnom energijom i ispunjenosti kriterija za novoimenovana lica ovlaštena za zastupanje, dao je osnovu DERK-u da pristupi izmjeni podataka u registru licenci, odnosno pripremi Načrt odluke o izmjeni licence za djelatnost međunarodne trgovine, koja će se i dalje koristiti u skladu sa Standardnim uvjetima za korištenje licence za obavljanje djelatnosti međunarodne trgovine električnom energijom.

Ovaj dokument je od 8. augusta 2025. godine učinjen dostupnim podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj javnoj raspravi zakazanoj za 13. augusta 2025. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

Kako podnosilac zahtjeva ni u posljednjoj prilici, po podnesku DERK-a broj 05-28-12-220-14/25 od 18. augusta 2025. godine, nije isticao neslaganje s bilo kojom odredbom Prijedloga odluke, bilo je osnovano zaključiti da se prijedlog DERK-a smatra sačinjenim u skladu sa Zakonom o prijenosu, regulatoru i operatoru sistema električne enegije u BiH i podzakonskim propisima koji reguliraju predmetnu materiju.

Imajući u vidu da promjena svih navedenih podataka u registru nadležnog suda, a potom i u registru licenci koji vodi DERK, nema utjecaj na pravni položaj vlasnika licence i daljnje nesmetano korištenje licence jer je u pitanju isto pravno lice, to je, na osnovu člana 49. stav (7) Pravilnika o licencama – Prečišćeni tekst, donijeta odluka kao u dispozitivu.

Shodno navedenom, obaveze vlasnika licence utvrđene Rješenjem o plaćanju regulatorne naknade za 2025. godinu broj 05-28-12-314-28/24 od 3. januara 2025. godine ostaju nepromijenjene, te je pravno lice “Green Energy Trading – Trgovina zelenom energijom” d.o.o., Čitluk, dužno plaćati regulatornu naknadu na način i u rokovima kako je to utvrđeno pomenutim Rješenjem.

U skladu s članom 9.2. Zakona o prijenosu, regulatoru i operatoru sistema električne energije u Bosni i Hercegovini, protiv ove Odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema.

Broj: 05-28-12-220-16/25

3. septembra 2025. godine

Tuzla

Predsjedavajući Komisije

Suad Zeljković